

Hildward Croes: Areglista di 1988

ORANJESTAD (AAN)- Diaranzon 28 di December Promociones Cultura Aruba den nan programa di tur fin di aña na Tele Aruba, Premio Mo Tito - Rufo Wever, a otorga na e hoben musico Hildward Croes e maximo galardón di Areglista di aña.

Hildward ta un persona cu ta destaca elocuentemente ariba tereno musical na Aruba.

Biniendo di un famia musical Hildward na edad di 6 aña ya tabata figura den grupitonan juvenil como cantante. Cu su 8 aña el a cuminsa toca piano heredando su talento di su tata kende tabata dirigente di coro di misa di Santa Cruz y di su mama cu tabata cantante den e coro menciona. For di hoben e tabata pasa dande tur fin di aña cu e grupo di su omo Betico.

Hildward tabata integra den diferente bandanan musical na Aruba, incluyendo e popular ex-agrupacion "Cryptus Confession" cu cual agrupacion el a viaha pa varios pais den ex-

terior y a graba un long-play na 1979 conteniendo e tema inmortal "Love Dream" cu ta di su propio inspiracion.

For di aña 1981 pa 1986 Hildward a permanece na Estados Unidos na unda el a realiza su Bachelors of Masters of Music Degree. Durante e temporada aki Hildward tabata regresa Aruba pa participa den diferente contest y festivalnan di musica. Hildward su areglonan tabata sobresalí den festivalnan di tumba y calypso di nos carnaval.

Di regreso na Aruba e hoben musico a institui un onda nobo di areglo ariba e isla cu un estilo orchestral. El a produci un cantidad di grabacionnan di alto nivel den studionan di grabacion local.

Na fin di 1984 Hildward a conquista e titulo di areglista di aña, a bira musico di aña 1986, y a ricibi premio Mo Tito - Rufo Wever como areglista di aña 1987.

Den aña 1988 por a scucha un cantidad di jingles musical produci pa Hildward Croes na Radio stacionnan Arubano, manera e jingle di carnaval 34. Hildward a compone y aregla e roadmarch di carnaval pa e cantante Long Roy "More for 34", a aregla "Hala Pega" cu a hiba Raymond Kamperveen na e titulo di Rey di Tumba Juvenil y tumba di carnaval "Bida" cu a worde canta pa Didi Wernet.

Dos obra instrumental compone y aregla pa e hoben areglista/compositor a rezona den e weganan di Olympiada na Seoul, Korea hunto cu e representantenan den categoria Syncrosswimming: The Baracudas. Grupo teatral Kibrahacha a estrena e obra "E Recompensa" cu areglonan y musicalizacion di Hildward Croes. Areglos y background musical a worde haci tambe pa e documentario "Para Aruba con Amor" bao produccion di e conocido Venezolano Raul Amundaray.

Tambe el a aregla y produci un cantidad di long-play y 45 pa cantante y gruponan musical, incluyendo e disco local di aña,



"It's my time" di Long Roy. Mientras cu Hildward tabata siguiendo cursonan di musica na Bowling Green Staten University, el a compone y aregla cancionnan cu a participa den Festival Aruba, di cual dos a finaliza entre e 5

mihornan.

Pa Promociones Cultura Aruba Hildward Croes ta e

areglista mas sobresaliente den 1988. Ta di spera cu lo tende mucho mas di e hoben musico Arubano aki den aña 1989.